



Republika e Kosovës – Republika Kosova
Paneli Zgjedhor për Ankesa dhe Parashtresa
Izborni Panel za Žalbe i Predstavke

Anr.128/2019

Paneli Zgjedhor për Ankesa dhe Parashtresa (PZAP), në panelin e përbërë nga gjyqtarët: Adnan Konushevc, kryesues, Nenad Lazić dhe Afijete Sada-Gllogjani, anëtarë, me pjesëmarrjen e Zyrtares Ligjore Vlerona Maliqi, duke vendosur përkitazi me ankesën e subjektit politik Lëvizja Vetëvendosje (LVV), me seli në Prishtinë, paraqitur kundër subjektit politik Partia Demokratike e Kosovës (PDK), me seli në Prishtinë, për shkak të vendosjes së materialit zgjedhor në hapësira publike, për Zgjedhjet e Parakohshme për Kuvendin e Republikës së Kosovës, që do të mbahen më datë 06.10.2019, në seancën e panelit të mbajtur më datë 02.10.2019, mori këtë:

V E N D I M

Pranohet e bazuar ankesa e subjektit politik Lëvizja Vetëvendosje (LVV), me seli në Prishtinë, e evidentuar me shenjë A nr. 128/2019 e datës 29.09.2019, subjektit politik Partia Demokratike e Kosovës (PDK), me seli në Prishtinë, i shqiptohet gjobë në shumë prej 2,300.00 (dymijë e treqind) euro, të cilën gjobë detyrohet ta paguaj në afat prej 15 (pesëmbëdhjetë) ditëve, nga dita e pranimit të këtij vendimi nën **kërcënim të përmarimit**.

A r s y e t i m

Me datë 29.09.2019, Lëvizja Vetëvendosje (LVV), ka paraqitur ankesë në PZAP, në të cilën pretendon se me datë 28.09.2019, rreth orës 16:20, aktivistet e Lëvizjes Vetëvendosje, qendra në Prishtinë, në Kampusin e Universitetit të Prishtinës, kanë vërejtur se aktivistët e subjektit politik Partia Demokratike e Kosovës (PDK), kanë vendosur tendë dhe një lloj tavoline me material propagandues, veprime këto sipas paraqitësit të ankesës, të sanksionuara me dispozitën e nenit 33 pika b) të LZP-së, dhe Rregullën Zgjedhore Nr.13/2013 të KQZ-së. Në mbështetje të pretendimeve ankimore, paraqitësi i ankesës, ka bashkangjitur disa fotografi të printuara, në cilësi të provave materiale.

Në përgjigjet në ankesë subjekti politik Partia Demokratike e Kosovës (PDK), lidhur me pretendimet e paraqitësit të ankesës thekson se vendosja e tendës në Kampusin e Universitetit të Prishtinës, është bërë para datës 27.09.2019, dhe atë me leje të Komunës së Prishtinës, duke shtuar se fotoja e cila i është bashkangjitur ankesës është e datës 27.09.2019, ankesa është paraqitur më datë 29.09.2019, kurse largimi i tendës është bërë më datë 27.09.2019 pas orës

16:00, gjë kjo e cila dëshmohet me pëlqimin e përkohshëm të dhënë nga Komuna e Prishtinës. Në fund ka propozuar që PZAP-i, ta hudhë poshtë ankesën.

Në mbështetje të pretendimeve të tij, paraqitësi i përgjigjes në ankesë, ka bashkangjitur pëlqimin për vendosjen e tendës, dhënë subjektit politik PDK, përmes Drejtorisë së Shërbimeve Publike, Mbrojtjes dhe Shpëtimit, si dhe dy fotografi të Kampusit të Univeritetit të Prishtinës, në cilësi të provave materiale.

PZAP-i, pasi që shqyrtoj ankesën dhe shkresat tjera të lëndës vlerësoi se **ankesa është e bazuar**, për këto arsye:

Paneli nga fotot e ofruara si provë nga parashtuesi i ankesës, të cilat gjenden në shkresat e lëndës, në mënyrë të padyshimtë, ka konstatuar se tenda me materiale zgjedhore të subjektit politik Partia Demokratike e Kosovës (PDK), është vendosur në hapësirat publike në Kampusin e Universitetit të Prishtinës, në Prishtinë.

Nga dëshmitë e sipërcituara paneli në mënyrë të sigurt ka vërtetuar se nga ana e subjektit politik Partia Demokratike e Kosovës (PDK), me seli në Prishtinë, janë bërë shkeljet e Kodit të Mirësjelljes për Subjekte Politike, Mbështetësit e tyre dhe Kandidatët, nga fakti se, tendat dhe tavolinat e vendosura në hapësirat publike, paraqesin veprime të sanksionuara me dispozitën e nenit 33 pika b) e LZP-së, e cila përcakton se: *“Vendosja e njoftimeve, pllakateve dhe postereve, ose përndryshe, vendosja e emrave të tyre ose e sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugë publike, në shenjat publike të trafikut, brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombëtare, ose brenda ose në hapësirat private pa lejen e pronarëve ose shfrytëzuesve”*.

Paneli, vendimin e tij e ka mbështet në dëshmi të qarta dhe bindëse siç përcaktohet me nenin 117 par. 3 të LZP-së, prandaj pretendimet në përgjigje në ankesë nuk u cilësuan me ndikim në meritat e lëndës.

Parashtrimet në përgjigje në ankesë, se veprimet e subjektit politik Partia Demokratike e Kosovës (PDK), nuk mund të sanksionohen si shkelje të LZP-së, për arsye se vendosja e tendës në shesh dhe shfrytëzimin e hapësirës publike, është bërë me pëlqimin e Komunës së Prishtinës. Paneli pretendimet e tilla i vlerësoj si të pa bazuara dhe si të tilla i refuzoj pasi që, me këto prova nuk justifikon veprimet që janë të ndaluara dhe në kundërshtim me dispozitat ligjore të Nenit 33 pika b) i LZP-së, si dhe neni 5 paragrafi 1 pika d) të Rregullës Zgjedhore Nr.13/2013, ku parashihet se subjektet e certifikuara politike aktivitetet e tyre zgjedhore duhet t'i bëjnë në pajtueshmëri me Rregullat zgjedhore të Komisionit Qendror Zgjedhor (KQZ). Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Sa i përket pretendimeve të paraqitësit të përgjigjes në ankesë, se nga ana e subjektit politik PDK, është bërë largimi i tendës me kohë, i mori parasysh dhe te cilat veprime të ndërmarra nga subjekti politik PDK, kanë ndikuar në lartësinë e gjobës së shqiptuar si në pikën -I-, të dispozitiv të këtij vendimi sepse këtë natyrë të shkeljes së Koditë të Mirësjelljes nga subjekti politik, sipas nenit 3 paragrafi 2 i Rregullës Zgjedhore 01/2012 të PZAP-it, përcaktohet dënimi me gjobë nga 5,100.00 euro e deri në 20,000.00 euro.

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, pjesëmarrjen e subjekti politik në zgjedhjet e mëparshme që konsiston në faktin se subjekti politik Partia Demokratike e Kosovës (PDK), ka qenë e njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore si dhe shumën e fondeve që ka marrë subjekti politik prej Buxhetit të Republikës së Kosovës, për zhvillimin e aktiviteteve lidhur me fushatën zgjedhore. Po ashtu si rrethanë PZAP-i, mori edhe faktin që këtij subjekti, i'a dha mundësinë për tu përgjigjur ashtu që në përgjigje, subjekti politik në fjalë ka theksuar se nga ana e tyre janë ndërmarrë masa për evitimin e shkeljes, gjë e cila vërtetohet nga fotografitë të cilat i janë bashkangjitur përgjigjes së tyre, ku shihet se në Kampusin e UP-së, nuk ekziston më tenda e subjektit politik PDK, rrethana këto të cilat kanë ndikuar në lartësinë e gjobës së shqiptuar si në dispozitiv të këtij vendimi. Paneli po ashtu vlerësoi se dënimi i shqiptuar ndaj subjektit në fjalë do të ndikoj që mos të përsëriten veprimet e kësaj natyre në të ardhmen.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa

Anr.128/2019 më datën 02.10.2019

**Kryesues i Panelit
Adnan Konushevc**



***Këshilla Juridike: Kundër këtij vendimi
nuk lejohet ankesa konform nenit 118 par
4 të LZP-së.***